

Նման էր թռչունների ճվլոցին, եւ իսկոյն ոչ այնքան հեռու գտնուած թուփերի միջից լսելի եղաւ Նոյնպիսի ձայն: Րոպէ չէր անցել, երբ այնտեղից դուրս վազեց փոքրիկ երեխայ, որ գալով Սուսանի մօտ, կպաւ նրա կուրծքին, եւ իր արեւից այրուած մերկ թեւքերով գրկելով նրա պարանոցը, սկսաւ համբուրել նրան:

Այս տեսարանը խիստ հոգեշարժ էր եւ իմ սնահաւատութեան վրայ ազդեց մի դիւթական զօրութեամբ. ես մտածում էի՝ փոքրիկ երեխան չէ՞ արդեօք այն ոգիներից մինը, որի միջնորդութեամբ Սուսանը կատարում է իր կախարդական արարողութիւնները: Իմ կարծիքին աւելի ուժ էր տալիս այն դիւթական հագուստը, որ խիստ սազ էր գալիս նրա վայելուչ կազմուածքին, որի իւրաքանչիւր գծերից երեւում էր վայրենի գեղեցկութիւնը իր պարզ եւ անկեղծ հրապուրանքով: Դա Նոյն երեխան էր, որ մի անգամ եւս երեւցել էր ինձ արաբական աւերակներում, երբ առաջին անգամ տեսայ Սուսանին:

Երբ նա տեսաւ ինձ, թողեց Սուսանին եւ ժպտալով վազեց իմ մօտ, կարծես, ես նրա վաղեմի ծանօթը լինէի:

– Գնի՛ր, պարոն, այս թիլիսմանը, Զիւբբին իր ձեռքովն է շինել, – ասաց ինձ:

Նա կրկին ժպտեց եւ սեւ փայլուն աչքերով սկսեց նայել իմ երեսին, տալով ինձ սաթից շինած մի տափակ-քառանկիւնի բան: Այն մի հմաեակ էր նախշած զանազան նշանագրերով, որի նմանը շատ անգամ տեսել էի կանանց պարանոցէն քաջ ընկած: Ես տոեցի իմ մօտ գտնուած միակ արծաթի դրամը եւ գնեցի փոքրիկ կախարդից թիլիսմանը: Նա գլուխ տոեց եւ կրկին վազեց Սուսանի մօտ:

– Զիւբբի, երգի՛ր մի բան պարոնի համար, նա քեզ աւելի փող տոեց, քան թէ կարժէր քո թիլիսմանը, – ասաց նրան պառաւը:

Փոքրիկ աղջիկը, առանց քաշոելու, խիստ համարձակ կերպով եղանակեց մի թէթեւ երգ ինձ բոլորովին անհասկանալի լեզուով. միայն նրա ձայնը իր թարմ եւ քաղցր հնչիւններով բաւականին ախորժ տպաւորութիւն գործեց իմ վրայ: Վերջացնելով իր երգը, նա կրկին վազեց իմ մօտ:

– Տու՛ր ձեռքդ, թող Զիւբբին գուշակէ քեզ համար, – ասաց նա իմ աջը բռնելով իր փոքրիկ ձեռքերով:

Ես թոյլ տոեցի: Նա նստեց ինձ մօտ: Ես մինչեւ այսօր չեմ կարող մոռանալ, թէ որպիսի խորհրդական ծանրութեամբ փոքրիկ մարգարեուհին սկսեց իր գուշակութիւնները, իմ աջ ափի գծերի մէջ կարդալով իմ ճակատա-